



Huez a declara liber un homber sospecha di a abusa di mucha muher di 12 año

ORANJESTAD (AAN): E homber Arubiano di inicial R., a keda hopi contento despues di a tende Fiscal bisa cu no por prueba cu R. ta esun cu a acusa di un mucha muher di 12 año y a pidi Hues declar'e liber. Hues a bay di acuerdo y a bisa cu no tin prueba cu ta R. a abusa di e mucha y a declar'e liber.

ABUSO DI MUCHA:

R. a presenta den sala di Corte y su abogado ta mr. Canwood. Fiscal a bisa cu ta acusa R. cu na Januari 2017 a viola un mucha muher di 12 año. R. a desmenti di tabatin relacion sexual cu e mucha.

Hues a remarca cu e mucha muher a declara cu el a worde obliga di tene relacion sexual na un cas abandona. Segun R. e tabata na e cas cu e mucha

pero nan a djis papia. Hues a remarca cu anterior R. a desmenti pero ora a confronta declaracion di testigo, el a admiti cu e tabata den e cas. R. a bisa cu e tin un malesa venerico y si ta e, el a pega e mucha.

Hues a remarca cu e mucha tin e malesa aki. R. a remarca cu e ora ey lo ta un otro hende a haci'e. El a bisa Hues cu e no ta bay bisa algo cu ta perjudica su mes. Hues a muestra cu tin investigacion na Januari 2018 di dokter cu ta 1 año despues di e incidente y a constata cu e mucha tin malesa.

Segun R., tur cos a cuminsa door cu e mama a haya e mucha cu un chupa na su garganta, un año despues. El a bisa cu e gay cu a tene relacion cu e mucha ta na Hulanda y segun R. el a worde bisa door di Polis cu nò por haci nada. Hues a muestra cu e mucha a bisa e mama cu un año promer esta Januari 2017 el a worde forza pa tin relacion sexual.

Hues a remarca pakico a warda asina hopi pa a bay haci investigacion medico. Ta asina cu desde October 2018, R. ta sera como sospechoso.

EXIGENCIA DI FISCAL:

Fiscal a bisa cu den caso di inmorlidad ta dificil yega na prueba. Ta e declaracion di e victima contra e declaracion

di e sospechoso. Den e caso aki e sospechoso a bisa cu si e tabatin relacion cu e mucha e lo tin malesa venerico. A resulta despues di 1 año cu a haci investigacion medico y constata cu e mucha tambe tin e malesa aki. Tin testigo cu a mira e sospechoso y victima ta cana tras di e cas y bula cura. E testigo no a mira nan tin relacion. Fiscal a muestra cu e testigo na October 2018 a declara cu un año promer el a mira R. y e victima pero esey ta October 2017. Esey ta haci cu no ta cuadra y ta haya cu mester declara R. liber.

Abogado mr. Canwood a bisa Hues cu e tambe ta comparti punto di bista di Fiscal cu mester declara R. liber pasobra no tin ningun prueba.

SENTENCIA:

Hues a sera tratamiento di e caso y dicta sentencia di biah. Hues a bisa cu no tin prueba cu R. a viola e mucha. Hues a remarca cu despues di 1 año ta bin cu declaracion di dokter cu e mucha tin malesa venerico. Pero di ken? For di tempo di e sucedido no a haci nada.

Un año despues a bay haci investigacion y no tin nada. Hues a declara R. liber. Por a mira cu R. a keda hopi contento y ora el a sali for di sala di Corte el a grita di alegría.